

JEMS

¹ E Jems. E Tamo Koba Yesus Kristus aqa Abu Qotei wo nan̄go wau tamo. Israel nan̄go moma utru 12 nan̄go leŋ agi nin̄gi. O was nin̄gi kalil kaiye. E na anjam endi nen̄gren̄yosim nun̄goq qarinyonum. Nin̄gi nun̄go segi segi qure utru uratosib jaraiyosib sawa sawa kalil keretosib di unub.

Iga gulbe qoboieqnum dena iga singila eqnum

² O ijo was, gulbe utru segi segi gargekoba nun̄goq boqnimqa nin̄gi gulbe deqa tulaŋ arebole-boleŋim soqniy. ³ Gulbe deqaji nun̄goq boqnimqa nin̄gi nun̄go areqalo Yesus qa bole singilatqab kiyo sai kiyo di Qotei a geregere un̄qas. Nin̄gi qalie, gulbe dena nin̄gi singilatŋeqnaqa nin̄gi gulbe qoboieqnum. ⁴ Deqa nin̄gi bati gaigai singila na tigeloqnsib gulbe qoboioqniy. Nin̄gi degyqab di nin̄gi Qotei aqa kumbra bei qa truquoqnasai. Nin̄gi tulaŋ kere na sqab.

Tamo bei a powo qa truquosimqa a Qotei pailym Qotei na powo yqas

⁵ Ariya tamo bei a powo qa truquosimqa a Qotei pailym. Yimqa Qotei na a powo yqas. Nin̄gi qalie, Qotei a tamo un̄gasari kalil nan̄gi in̄gi bole bole enjreqnu. Nan̄gi Qotei pailyeqnaq a nan̄gi qa olo ŋiriŋosaieqnu. ⁶ Ariya tamo bei a Qotei pailyaq osimqa a are gulbeiyaiq. Osim endegsi maraiq, “Qotei na in̄gi bole ebqas kiyo sai kiyo?” A degsi maraiq. A Qotei qa aqa areqalo singilatosim pailym. Jagwa tigelosiq yuwal korkortoqnsiqa

oqe aiyeqnu dego kere tamo are gulbeiyeqnu qaji a bati bei Qotei qa aqa areqalo singilatoqnsiqa olo bati bei aqa areqalo singilatosaieqnu. ⁷ Tamo Koba a na tamo deqaji nanği inği bei enjrqsai. Deqa tamo deqaji nanği endegsib are qalaib, “Iga inği bole bole oqnqom.” Di sai. ⁸ Nanği areqalo aiye aiyeltoqnsib kumbra laņa laņa yeqnu deqa Qotei na nanği inği bei enjrqsai.

Jems a ñoro tamo ti tamo inği saiqoji nanği ti anjam minjrej

⁹ Kristen was bei a ñam saiqoji soqnimqa a areboleboleyem. Di kiyaga? A Qotei aqa ñamgalaq di ñam koba ti unu deqa. ¹⁰ Tamo bei ñoro koba ti unu qaji a dego areboleboleyem. Di kiyaga? A Qotei aqa ñamgalaq di ñam saiqoji unu deqa. Tamo nanği ñoro koba koroiyqajqa arearetnjreqnu qaji nanği balamtamo aqa so bulosib sokiñalayosib morenqab. ¹¹ Iga qalie, seņ oqsim kanķanķamqa balamtamo aqa so laosim moiym aqa wala bole di koboqas. Dego kere tamo nanği ñoro koba ti unub qaji nanği wau bei bei yoqnsib bati qujai qa urur morenosib koboqab.

Qotei na iga are qametgosaieqnu

¹² Tamo unğasari gulbe qoboiyoqnsib singila na tigelejunub qaji nanği areboleboleinjreme. Mondonj Qotei a nanği qa tulaņ arearetim awai boledamu enjrim nanği ñambile gaigai sqab. Qotei a marej, “E na tamo kalil e qalaqalaibeqnu qaji nanği awai bole enjrqai.” Qotei a degsi marej. ¹³ Deqa tamo bei a une atqajqa are prugyimqa a endegsi maraiq, “Qotei na are qametbqoqa e une atqajqa are prugbeqnu.” A degsi maraiq.

Iga na Qotei aqa are qametim a une yqa keresai dego kere Qotei na iga une atqajqa are qametgo-saieqnu. ¹⁴ Gago segi segi are miligi tigelogsisa iga titgeqnu. Gam dena gago segi areqalo uge na iga uneq breigwa oqnsisa walawalaigoqnsisa gisanqe qnu. ¹⁵ Gago are miligi tigeleqnu di unja a gumaneqnu dego kere. Bunuqna unja a angtroteqnu dego kere gago are miligi tigelogsisa une babteqnu. Yeqnaqa gago une di tulan kobaeqnaqa iga moiyo gam tureqnum.

¹⁶ O ijo was bole, une aqa kumbra dena ninji gisanqaim deqa ninji une kalil uratiy. ¹⁷ Inji bole bole kalil Qotei na iga egeqnu qaji di lan goge na branteqnaq iga lana eleqe qnum. Abu Qotei suwanq di unu qaji a na inji di qarinyeqnaqa gagoq beqnu. Qotei a kumbra bubulyosaieqnu. A sen qunun bul sai. Sen qunun a olekobaoqnsisa olo trueqnu Qotei a degyosaieqnu. ¹⁸ A aqa segi areqalo dauryosiq iga gereigej deqa a gago Abu. A aqa anjam bole na iga gereigej deqa iga inji meli bunuj bulosim inji inji kalil a nami gereinjrej qaji di tulan bunjrejnum.

Iga Qotei aqa anjam lana quqwasai

¹⁹ O ijo was bole, ninji endegsi poingem. Ninji anjam bei marqa osibqa urur medabu waqtaib. Mati didaboqniy. Urur minjin oqaiq. ²⁰ Tamo nanji urur minjin oqetnjreqnu qaji nanji Qotei aqa kumbra bole dauryqa keresai. ²¹ Deqa ninji kumbra uge uge jigat kalil taqal waiyoqniy. Osib nunjo segi nam aguq atoqnsib Qotei aqa anjam a na nami nunjo are miligiq di atej qaji di ninji ojesoqniy. Ojesqab di Qotei a nunjo qunun oqas.

²² Ariya ningi Qotei aqa anjam di bole dauryoqniy. Lanja qusib olo urataib. Ningi lanja quqwab di ningi nungo segi jejamu gisanjyqab. ²³ Tamo bei a Qotei aqa anjam lanja quoqnsiq olo dauryqa urateqnu di a tamo ya jeqiloq di aqa ulatamu uneqnu dego bul. ²⁴ A ya jeqiloq di aqa ulatamu unsim olo puluosim giloqnsim aqa ulatamu unqo qaji di a olo are walyqas. ²⁵ Qotei aqa dal anjam bunuj unu. Dal anjam di bole tintinj. Qotei a gago une aqa singila kobotetgwa osiqa dal anjam di iga egej. Deqa gago une na iga olo ojqa keresai. Tamo nanji dal anjam di geregere peleiyoqnsib dauryoqnqab di Qotei a nanjo wau kalil boletqnsas. Ariya tamo nanji dal anjam di lanja qusib olo are walnjrqas di Qotei a nanjo wau bei boletqasai.

²⁶ Tamo bei a endegsi are qalqas, “E gaigai Qotei qa loueqnum. Deqa e Kristen tamo bole.” Ariya tamo di a aqa segi medabu geregere taqatqasai di a na aqa segi jejamu gisanjyqas. Deqa a Qotei qa loueqnu di a lanja loueqnu. ²⁷ Iga Kristen tamo ungasari unum deqa iga kumbra bole endeqaji yoqnqom. Iga na angro mandum nanji ti unja qobul nanji ti geregereinjroqnsim nanjo gulbe kalil qoboiyetnjrqom. Osim iga gago segi walwel taqatosim mandam endeqa kumbra jigat kalil uratekritqom. Iga kumbra deqaji yoqnqom di iga Qotei aqa namgalaq di Kristen tamo bole une saiqoji sqom.

2

Ningi na tamo kalil nanji turtnjrsib kumbra qu-jai enjroqniy

¹ O ijo was kalil, gago Tamo Koba Yesus Kristus a rian koba ti unu. Ningi a qa nungo areqalo singilateqnub deqa e ningi endegsi mernḡwai. Ningi na tamo ñam ti nanḡi areinjroqnsib olo tamo ñam saiqoji nanḡi qoreinjroqnaib. ²⁻³ Nunḡo kumbra agiende. Ñoro tamo bei a gara boledamu na walaosim banḡinḡ gol na gereiyo qaji di jigsim nunḡo Qotei tal miligiq gilqas di ningi aqa ñam soqtqab. Osib a geregereiyosib minjibqa awo jaram boleq di awoqas. Ariya tamo bei inḡi inḡi saiqoji a gara jigat branḡo jigsimqa Qotei tal miligiq gilqas di ningi aqa ñam aguq atsib minjqab, “Ni qalaq di tigelesoqne” o “Ni mandamq di awo.” ⁴ O ijo was, ningi kumbra degyeqnub di ningi areqalo uge ti sosib tamo nanḡi lanḡa peginjreqnub.

⁵ O ijo was bole, ningi quiy. Tamo unḡasari inḡi inḡi saiqoji nanḡi Qotei na giltnjrej deqa nanḡi torei a qa nanḡo areqalo singilateqnub. Agi Qotei a nami endegsi marej, “Tamo unḡasari e qalaqalaibeqnub qaji nanḡi di e na taqatnjrsiy nanḡo Mandor Koba sqai.” ⁶ O ijo was, ningi kiyayaqa tamo inḡi inḡi saiqoji nanḡo ñam aguq ateqnub? Ningi are qaliy. Yai nanḡi na ningi ugeugeinḡoqnsib nunḡo jejamuq di une enḡoqnsib ningi joqoqnsib anjam pegiyo talq di tigeltḡeqnub? Ñoro tamo nanḡi na ningi degḡeqnub. ⁷ Tamo nanḡi dena Yesus aqa ñam boledamu misilinḡeqnub. Ñam di agi Qotei a nunḡoq di atej unu.

⁸ Mandor Koba Qotei aqa dal anjam bei nami endegsib nenḡrenḡeb unu, “Ni ino segi jejamu gereiyeqnum dego kere tamo unḡasari nanḡi

degsim gereinjroqñime.” O ijo was, ñingi dal anjam di dauryosib keretqab di ñingi kumbra bolequja yqab. ⁹ Ariya ñingi na tamo qudei ñangi areinjroqñsib olo tamo qudei ñangi qoreinjreçnub di ñingi une ateqñub. Deqa ñingi dal anjam gotraño qaji tamo brantonub. ¹⁰ Tamo bei a dal anjam mutu kalil dauryekritosim ariya qujai bole qujai grotqas di a dal anjam mutu kalil grotekrito. Deqa aqa jejamuq di gulbe sqas. ¹¹ Iga qalie, Qotei a nami dal anjam endegsi marej, “Ni tamo bei aqa uña jejamu ojetaim.” Osiqa dego marej, “Ni tamo bei qalsim moyotaim.” Bole, ni tamo bei aqa uña jejamu ojetosaieqñum. Ariya ni tamo bei qalsim moyotqam di ni dal anjam gotraño qaji tamo brantqam. ¹² Qotei a gago une aqa siñgila kobotetgwa osiqa dal anjam bunuj egej. Deqa gago une na iga olo ojqa keresai. O ijo was ñingi quiy. Qotei a dal anjam deqa are qalsim iga pegigwas. Deqa ñingi nuño anjam maro ti nuño kumbra ti kalil geregere taqatoqñiy. ¹³ Ñingi tamo ñangi qa dulqasai di une pegiyo bati qa Qotei a kamba dego ñingi qa dulqasai. Ariya ñingi tamo ñangi qa duloqñqab di une pegiyo bati qa ñingi une saiçoji sqab.

Tamo a Yesus qa aqa areqalo siñgilatqas di a kumbra bole babtoqñqas

¹⁴ O ijo was ñingi quiy. Tamo bei a mareqñu, “E Yesus qa ijo areqalo siñgilateqñum.” A degsi maro-qñsiq ariya a kumbra bole bei yala babtosaieqñu. Laña medabu na anjam mareqñu. Deqa tamo di Qotei na oqasai. ¹⁵⁻¹⁶ Kristen was bei a gara saiçoji kiyo iñgi saiçoji kiyo soqñimqa nuño ambleq di

tamo bei na minjqas, “Ni lawo na gilsim gara bei osim jigsim inji uysim menetmim soqne.” A anjam segi laņa minjqo deqa anjam dena kiyersim a aqaryaiyqas? Keresai. ¹⁷ Dego kere iga Yesus qa gago areqalo siņgilatosim ariya iga kumbra bole bei babtosaieqnum di iga laņa gago areqalo Yesus qa siņgilateqnum. Deqa iga tamo moisiq aqa jejamu laņa unu dego bul sqom.

¹⁸ Tamo bei a endegsi marqas, “E Yesus qa ijo areqalo siņgilateqnum.” Degsi marimqa e na kamba minjqai, “O was, ni kumbra bole bei babtosaieqnum. Deqa e kiyersiy qalieqai, ni bole Yesus qa ino areqalo siņgilateqnum? E qalieqa keresai. Ariya e Yesus qa ijo areqalo siņgilatosiy kumbra bole dego turtosiy yoqnqai di ni e nubsim merbqam, ‘Bole, ni ino areqalo Yesus qa bole siņgilateqnum.’ ¹⁹ Ni mareqnum, ‘Bole, Qotei a segi qujai unu.’ Ni kere mareqnum. Mondor uge nanqi dego degsib maroqnsib Qotei ulaiyeqnum. ²⁰ Ni nanari tamo. Ni mareqnum, ‘E Yesus qa ijo areqalo siņgilateqnum.’ Ni degsi maroqnsim ariya ni olo kumbra bole bei babtosaieqnum. Deqa ni laņa medabu na mareqnum. Ni ijo anjam endi poimqa are soqnim poimeme.” ²¹ O ijo was niņgi quiy. Nami gago moma utru Abraham a na aqa anqro qujai Aisak osiq Qotei atraiyqa marsiq atra bijalq di atej. Atnaqa Qotei a Abraham aqa kumbra di unsiq minjej, “Ni degyonum deqa ni ijo ņamgalaq di tamo bole une saiqoji unum.” ²² Niņgi are qaliy. Abraham a Qotei qa aqa areqalo siņgilatosiq kumbra bole dego turtosiq yej. Aqa areqalo Qotei qa siņgilatej qaji de ti aqa kumbra bole ti aiyeltosiq dauryej. Deqa iga endegsi mar-

qom, Abraham aqa kumbra bole dena aqa areqalo Qotei qa singilatej qaji di taqyosiq tulan keretej.

²³ Deqa Qotei aqa anjam bei nami nengrenyeb qaji aqa damu brantej. Anjam agiende, “Abraham a Qotei qa aqa areqalo singilatej deqa Qotei na minjej, ‘Ni ijo namgalaq di tamo bole une saiqoji unum.’” Osiga Abraham minjej, “Ni ijo was bole.”

²⁴ Deqa ijo was ningi qalie, tamo nanngi Yesus qa nanngo areqalo singilatosib ariya nanngi olo kumbra bole bei babtqasai di nanngi Qotei aqa namgalaq di tamo bole une saiqoji sqa keresai. Tamo nanngi Yesus qa nanngo areqalo singilatoqnsib kumbra bole dego turtosib yeqnub qaji nanngi segi Qotei aqa namgalaq di tamo bole une saiqoji unub.

²⁵ Ningi sambala unja Rahap a qa dego are qaliy. Rahap aqa kumbra bole agiende. Josua a tamo aiyel nanngi qarinnjrnaqa Jeriko qureq gilnabqa qure deqaji nanngi na tamo aiyel nanngi di numqa laqnab Rahap a nanngi aiyel ulitnjrej. Osiga gam bei osornjrnaqa nanngi jeu tamo nanngi alelnjrsibqa jaraiyeb. Rahap a kumbra bole di yej deqa a Qotei aqa namgalaq di unja bole une saiqoji soqnej. ²⁶ Iga qalie, tamo a me mondor ti sqasai di a moiqas. Dego kere tamo bei a Yesus qa aqa areqalo singilatosim ariya a olo kumbra bole babtqasai di a tamo moisiq aqa jeamu lanja unu dego bul sqas.

3

Iga gago segi medabu gegerere taqatqom

¹ O ijo was kalil, tamo quja quja segi Qotei aqa anjam palontoqnebe. Tamo gargekoba nanngi

anjam palontoqnaib. Niŋgi qalie, mondoŋ une pegiyo batiamqa Qotei na anjam palonto tamo nanŋo wau qa geregere peginjrqas. ² Bati gaigai iga kumbra gro groyeqnum. Ariya iga gago anjam maro qa grotqasai di iga tamo bolequja sqom. Sosimqa gago baŋ ti siŋga ti jejamu ti kalil geregere taqatqom. ³ Iga hos nanŋo medabuq di sil atoqnsim nanŋi titnjreqnam nanŋi iga daurgeqnum. Iga nanŋo medabu segi ojeqnam nanŋo jejamu dego iga daurgeqnu. ⁴ Niŋgi qobuŋ uniy. Qobuŋ a tulaŋ kobaquja. Aqa kuŋi tulaŋ kiŋala. Ariya jagwa koba tigelosiq qobuŋ tutqa laqnaqa qobuŋ aqa abu na kuŋi ojoqnsiq tingiteqnaq qobuŋ a dauryoqnsiq gileqnu. ⁵ De go kere gago medabu kiŋala. Ariya a diq koba yeqnu. Iga gago medabu waqtoqnsim gago segi ñam soqtoqnsim diqoqnsim anjam mareqnum.

Iga qalie, ŋamyuwo yusiq tulaŋ kobaqujaoqnsiq ŋamtaŋ kalil yueleneqnu. ⁶ Gago medabu a ŋamyuwo bul. Iga gago medabu waqtoqnsim dena iga kumbra uge uge yoqnsim gago jejamu kalil tulaŋ jigateqnum. Mondoŋ tamo nanŋi ŋamyuwoq aisib padalqab dego kere gago medabu na gago so tulaŋ ugeugeiyeqnu. ⁷ Niŋgi wagme nanŋi qa are qaliy. Wagme ti qebari ti qe ti kalil iga na taqatnjreqnum. ⁸ Ariya iga gago medabu taqatqa keresai. Iga gago medabu na gaigai anjam uge uge mareleneqnum. Amal uge na tamo nanŋi uñinjroqnsib moiyoŋnjreqnub dego kere gago medabu na iga kumbra uge ugeq breigeqnu. ⁹ Gago kumbra agiende. Iga gago medabu waqtoqnsim gago Tamo Koba Abu Qotei aqa ñam soqto-

qnsim olo puluoqnsim medabu qujai dena tamo ungasari nanngi misilinjnreqnum. Tamo ungasari nanngi di Qotei na gereinjrsiqa aqa segi so boleq di atej. ¹⁰ Iga kumbra uge deqaji yeqnum. Agi iga gago medabu waqtoqnsim Qotei aqa ñam soqtoqnsim olo medabu qujai dena anjam uge uge mareleñeqnum. O ijo was, gago kumbra di ugedamu. ¹¹ Ya jumbum qujaiq na ya bole ti ya uge ti brantqa keresai. ¹² Qura na oliv aqa gei oqa kere e? Wain sil na qura aqa gei oqa kere e? Yuwal a ya bole bulyqa kere e? Sai.

Tamo powo bole ti unub qaji nanngi kumbra bole bole yoqnebe

¹³ Nunngo ambleq di tamo qudei nanngi qalie ti powo ti unub kiyo? Sqab di nanngi nanngo segi ñam aguq atoqnsib kumbra bole bole yoqnebe. Yim tamo ungasari nanngi nanngo kumbra di unoqnsib maroqnqab, “Nanngi tamo bole.” ¹⁴ Ariya ninngi olo nunngo segi jechamu qa are qaloqnsib laña are ugeinñoqnm diqoqnaib. Ninngi degyqab di ninngi gisan kumbra dauryosib Qotei aqa anjam bole ugetqab. ¹⁵ Osib ninngi powo uge ti sqab. Powo deqaji lañ goge na bosai. Di mandam qaji powo. Di gago areqalo namij aqa powo. Powo di Satan aqaq na beqnu. ¹⁶ Ninngi quiy. Tamo ungasari nanngi nanngo segi jechamu qa are qaloqnsib laña are ugein-jroqnm diqoqnqab di nanngi so tulan ugeq di sosib kumbra uge uge yoqnqab. ¹⁷ Ariya tamo ungasari lañ goge na powo eqnub qaji nanngi kumbra tulan bolequja yeqnub. Nanngi kumbra jigat dauryo-saieqnub. Nanngi lawo na sosib tamo nanngi jinnga na gereinjroqnsib nanngi qa duloqnsib kumbra bole

bole osornjreqnub. Nanği na tamo kalil nanği turtnjroqnsib kumbra qujai enjreqnub. Nanği laña baban na Qotei aqa kumbra dauryosaieqnub. Nanği bole dauryeqnub. ¹⁸ Tamo deqaji nanği lawo na sosib are qujaitoqnsib jeu turyoqnsib kumbra bole tinğinğ babteqnub. İnği meli branteqnu dego kere.

4

Tamo bei na mandam qaji kumbra qalaqalaiyqas di a olo Qotei jeutqas

¹ O ijo was, ninği qudei nunğo segi jejamu qa areboleboleinğeqnaqa kumbra uge uge yqa-jqa are prugnğeqnu. Utru deqa ninği qotoqnsib nğinğkobaeqnub. Kumbra di nunğo jejamu miligiq di sinğila na waueqnu. ² Ninği inği inği koba oqajqa tulan arearetnğeqnaqa mamaulnğeqnu. Ariya ninği inği inği di osaieqnub deqa ninği qoto tigeltoqnsib tamo nğumeqnub. Ninği inği inği di osaieqnub di aqa utru agiende. Ninği Qotei pailyosaieqnub deqa. ³ Ninği qudei inği inği qa Qotei pailyoqnsib ariya ninği inği inği di osaieqnub. Di kiyaaqa? Ninği nunğo segi jejamu qa areboleboleinğwajqa maroqnsib areqalo uge na pailyeqnub deqa. ⁴ Uña bei na aqa gumbulunğ uratosiq olo tamo bei ombla sambala kumbra yeqnub dego kere ninği Qotei uratoqnsib kumbra uge uge yeqnub. Ninği quiy. Tamo bei na mandam qaji kumbra qalaqalaiyqas di a olo Qotei jeutqas. Ninği di qaliesai kiyo? Od, tamo bei na mandam qaji kumbra qalaqalaiyqa are qalqas di a Qotei jeutqas. ⁵ Agi Qotei aqa anjam bei nami endegsib nenğrenğyeb unu, “Qotei na aqa

Mondor gago are miligiq di atej unu. Mondor di a iga qa tulan areareteqnu.” O ijo was, ningi anjam di laña sa anjam edegaib.

⁶ Qotei a iga qa are tulan boleiyeqnu. Deqa aqa anjam bei nami endegsib nenjrenjyeb unu, “Tamo ungasari nanjo segi ñam soqteqnu qaji nanji Qotei na olo jeutnjreqnu. Ariya tamo ungasari nanjo segi ñam aguq ateqnub qaji nanji qa Qotei a olo are boleiyeqnu.” ⁷ Deqa ijo was, ningi nunjo segi ñam aguq atoqnsib Qotei aqa sorgomq di soqniy. Sosibqa Satan gotranjoqniy. Yimqa Satan na ningi uratngosim ulanqas. ⁸ Ningi Qotei jojomyoqniy a kamba dego ningi jojomyoqniy. O une tamo, ningi quiy. Tamo nanji nanjo ban yansoqnsib jiga koboteqnu dego kere ningi nunjo are miligi gereiyosib bulyoqniy. Ningi areqalo aiye aiyelteqnu qaji olo nunjo are miligiq dena jiga kalil taqal atoqniy. ⁹ Ningi nunjo une qa are gulbeingoqniy akamugetoqniy. Od, ningi nunjo kiki uratoqnsib olo akamoqniy. Osib nunjo arebolebole kobotosib olo are gulbeingoqniy. ¹⁰ Ningi Tamo Koba aqa namgalaq di nunjo segi ñam aguq atoqniy. Ningi degyqab di a na nunjo ñam olo soqfetngwas.

Ningi nunjo Kristen was nanji uge qa minjraib

¹¹ O ijo was, ningi segi segi qa anjam uge maroqnaib. Tamo bei na aqa Kristen was qudei nanji anjam uge minjraqas kiyo nanjo une qa nanji peginjraqas kiyo di a dal anjam dego uge qa marsiq pegiyqo. Ningi dal anjam pegiyeqnu di ningi dal anjam dauryqa urateqnu. ¹² Qotei a segi na dal anjam babtej deqa a na qujai iga pegigwa kere.

A na qujai tamo unğasari nanğı elenqa kere. A na qujai nanğı padaltnjrqa kere. Niñgi tamo kiyero deqa niñgi na tamo unğasari nanğı peginjreqnub? Di kumbra uge.

Niñgi nuñgo segi ñam soqtoqnaib

¹³ Niñgi qudei endegsib mareqñub, “Bini kiyo nebe kiyo iga qure beiq gilsim dia wausau qujai sosim silali qa wauosim olo bqom.” ¹⁴ Niñgi degsib mareqñub. Ariya nebe kumbra kiye nuñgoq di brantqas di niñgi qalieqa keresai. Niñgi ñam qurem bul sokiñalayosib koboqab. ¹⁵ Deqa niñgi endegsib maroqñiy, “Tamo Koba a marimqa iga kumbra kiye yqa are qalsim yqom.” ¹⁶ Kiyaya niñgi qudei olo nuñgo segi ñam soqtoqnsib diqoqn-sib laqñub? Nuñgo kumbra di uge. ¹⁷ Ni geregere are qale. Ni kumbra bole qa qalieosim ariya ni dauryqasai di ni une yonum.

5

Tamo nanğı ñoro koba ti unub qaji nanğı awai ugedamu oqab

¹ O ñoro tamo niñgi quiy. Bunuqna gulbe kokba nuñgoq boqnqas. Niñgi deqa pailoqnsib akamuge-toqñiy. ² Nuñgo ñoro ti wala ti kalil ugeelenqo. Sisimbiñ na nuñgo gara kalil dego ugeugeiyqo. ³ Nuñgo gol ti silva ti di baisuwi na ugetqo. Deqa mondoñ baisuwi dena nuñgo une boleq atsim ñamyuwo bulosim nuñgo jejamu koitosim ugeugeiyqas. Niñgi ñoro koba koroiyeb deqa diño bati qa niñgi awai ugedamu oqab. ⁴ Niñgi quiy. Nuñgo wau tamo nanğı nuñgo inğı meli gentoqnsib nuñgo banq di ateqñab niñgi na kamba olo nanğı

gisanjroqnsib awai oto nungo segi qa getentoqnsib oto segi nanngi enjreqnub. Deqa nanngi maoqnsib endegsib Qotei pailyeqnub, “O Tamo Koba, nanngi iga kumbra uge degsib egeqnub.” Yeqnaqa Qotei singila koba ti unu qaji a nanngo pailyo di queqnu. Deqa mondon a na nanngi awai uge engwas. ⁵ O ñoro tamo, nanngi gara bole bole jugoqnsib nunngo segi jejamu qa areboleboleingeqnaqa ingi koba uyeqnub. Deqa mondon Qotei na nanngi lungwas. Kaja nanngo jejamu diq diqeqnaq nanngo mandor nanngi na ñumeqnub dego kere Qotei na nanngi lungwas. ⁶ Nunngo kumbra uge bei agiende. Nanngi na kumbra bole yo qaji tamo nanngo jejamuq di une qamet-njroqnsib ñumeqnub. Ariya nanngi na kamba olo nanngi gotrangosaieqnub.

Ninggi gulbe qoboioqnsib Tamo Koba a olo bqajqa tariñoqniy

⁷ Deqa ijo was, nanngi nunngo are miligi singilatoqnsib gulbe qoboioqnsib Tamo Koba a olo bqajqa tariñoqniy. Nanngi asgingaiq. Nanngi wau lanja nanngi bul soqniy. Nanngi qalie, wau lanja nanngi asginjrosaiqnu. Nanngi ingi yagoqnsib awa qa tariñeqnub. Awa beqnaqa ingi melieqnaqa nanngi ingi meli di oqnsib uyeqnub. ⁸ Dego kere nanngi nunngo are miligi singilatoqnsib gulbe qoboioqnsib tariñoqniy. Tamo Koba a bqajqa bati jojomqo deqa nanngi degyoqniy.

⁹ O ijo was, nanngi Qotei aqa tamo ungasari qudei nanngi qa njirinoqnsib yomuqnaib. Qotei a nunngo une di unsim nanngi pegingo uge. Nanngi quiy. Une Pegiyo Tamo agi bqajqa jojomqo. A siranmeq di tigele-junu. ¹⁰ O ijo was, nanngi Qotei aqa medabu o qaji

tamo nanği qa are qaliy. Nanği nami Tamo Koba aqa ñam na anjam palontoqneb deqa jeu tamo nanği na nanği ugeugeinjroqneb. Ariya nanği Qotei aqa anjam marqa ulaosaiogneb. Nanği nanço are miligi siŋgilatoqnsib jaqatiŋ oqnsib gulbe di qoboiyoqneb. ¹¹ Niŋgi quiy. Iga endegsi mareqnum, “Tamo unğasari gulbe qoboiyoqnsib siŋgila na tigelejunub qaji nanği Qotei na taqat-njreqnu. Deqa nanği areboleboleinjreqnu.” Niŋgi Jop aqa kumbra qa nami queb. Jop a siŋgila na tigelosiqa gulbe kobaquja qoboiyesoqnej. Niŋgi qalie, bunuqna Tamo Koba a na Jop olo boletej. Od, iga qalieonum, Tamo Koba a gaigai iga qa duloqnsiqa iga qa are boleiyeqnu.

Niŋgi anjam bei marqa osibqa iŋgi bei na siŋgilataib

¹² O ijo was kalil, e anjam kobaquja bei unu. Anjam agiende. Niŋgi anjam bei marqa osibqa iŋgi bei na siŋgilataib. Niŋgi laŋ qure aqa ñam na anjam siŋgilataib. Niŋgi mandam aqa ñam na anjam siŋgilataib. Niŋgi od qa segi mariy. Niŋgi said qa segi mariy. Niŋgi degyqab di Qotei na niŋgi awai uge bei eŋwasai.

Tamo nanği kumbra bole bole yeqnu qaji nanço pailyo siŋgila koba

¹³ Nunço ambleq di tamo qudei nanği jaqatiŋ eqnub kiyo? Degamqa niŋgi na minjribqa nanği nanço jaqatiŋ deqa Qotei pailyoqnebe. Nunço ambleq di tamo qudei nanği areboleboleinjreqnu kiyo? Degamqa niŋgi na minjribqa nanği Qotei qa louoqnsib aqa ñam soqtoqnebe. ¹⁴ Nunço ambleq di tamo qudei nanği mainjreqnu kiyo? Degamqa

nıngi na minjribqa nanđi Kristen gate nanđi met-njrib bosib Tamo Koba aqa ñam na nanđo gateq di ban atetnjrsib goreñ bilentosib nanđi qa pailyebe. ¹⁵ Nanđi Tamo Koba a qa nanđo areqalo singilatosib pailyqab di a na tamo mainjro qaji nanđi olo tigeltnjrqas. Osim nanđi une yoqneb degamqa a na nanđo une kalil dego kobotetnjrqas. ¹⁶ Deqa ijo was, nıngi nunđo segi segi une palontonsib Kristen was nanđi ubtosib minjroqniy. Osib nıngi segi segi qa Qotei pailyoqniy. Yim a na nıngi boletngwas. Tamo nanđi kumbra bole bole yeqñub qaji nanđo pailyo di singila koba. Deqa nanđi pailyeqñab Qotei a quoqnsiqqa nanđo anjam dauryeqñu. ¹⁷ Nıngi Elaija qa are qaliy. A iga bul mandam tamo. Ariya a endegsi pailyoqñej, “O Qotei, ni na lañ getentimqa awa bqasai.” A degsi pailyeqñaqqa Qotei na lañ getentonaqa awa bosai. Degsi sonaq wausau qalub bei oto koboej. ¹⁸ Onaqa Elaija a olo pailyonaqa lañ waqonaqa awa bej. Bosiq inđi inđi kalil melieliñej.

Kristen was bei a gam bole uratqas di iga na aqaryaiyimqa a olo Qotei aqa areq bqas

¹⁹ O ijo was nıngi quiy. Kristen was bei a Qotei aqa anjam bole dauryqa uratimqa tamo bei na a olo are bulyetqas di tamo dena aqa was kumbra bolequja yqo. ²⁰ Nıngi endegsib qalieoiy. Kristen was bei a une ti soqñim tamo bei na aqaryaiyimqa a gam uge di uratqas di tamo dena aqa was aqa qunun moiyo sawaq dena oqo. Deqa was di a moiqasai. Qotei na aqa une gargekoba kobotetqas.

Yesus Aqa Anjam Bole 2000
The New Testament in the Anjam language of Papua
New Guinea, 2000 edition
Nupela Testamen long tokples Anjam long Niugini,
2000

Copyright © 2000 The Bible Society of Papua New Guinea

Language: Anjam

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2001-01-01

PDF generated using Haiola and XeLaTeX on 11 Nov 2022 from source files dated 9 Oct 2020

6bd977a8-0139-583b-a367-c04faf6223cc